

COX, ARTHUR HUBERT (1884 - 1961) daearegwr

Enw: Arthur Hubert Cox
Dyddiad geni: 1884
Dyddiad marw: 1961
Priod: Florence Elizabeth Cox (née Page)
Rhiant: Mary Cox
Rhiant: Arthur James Cox
Rhyw: Gwryw
Galwedigaeth: daearegwr
Maes gweithgaredd: Natur ac Amaethyddiaeth; Gwyddoniaeth a Mathemateg
Awdur: Brynley Francis Roberts

Ganwyd 2 Rhagfyr 1884 yn Birmingham yn fab Arthur James Cox a'i wraig Mary. Addysgwyd ef yn Ysgol Ramadeg Edward VI yn Birmingham, ac yna ym Mhrifysgol Birmingham lle y graddiodd yn B.Sc. yn 1904 ac M.Sc. yn 1905. Enillodd raddau uwch Ph.D. Strassburg a D.Sc. Birmingham. Yr oedd yn F.G.S. a dyfarnwyd iddo fedal Lyell y Gymdeithas Ddaearegol yn 1948. Dechreuodd ei yrfa'n ddarlithydd mewn daeareg yn C.P.C. Aberystwyth yn 1909, ond symudodd i King's College Llundain y flwyddyn ganlynol. Yr oedd yn aelod o'r Arolwg Ddaearegol yn 1917 ond penodwyd ef yn Athro Daeareg yn C.P.C. yng Nghaerdydd yn 1918, swydd a ddaliodd nes ymddeol yn 1949. Bu'n gweithio ar arfordir Penfro a Chader Idris gan ehangu'r wybodaeth am losgfynddoedd y cyfnod Ordofigaidd, ond ei gyfraniad mwyaf oedd ei astudiaeth o strwythur daearegol de Cymru. Sylweddolodd yn gynnar bwysigrwydd economaidd yr wybodaeth ddaearegol a ddô i'r amlwg, e.e. yn yr ymchwil i amodau cronfeydd olew a mwynau, ac yr oedd ei ymchwil i achosion clefyd y llwch o arwyddocâd arbennig. Bu'n flaenllaw hefyd yn natblygiad Amgueddfa Genedlaethol Cymru.

Priododd Florence Elizabeth Page yn 1919. Bu farw yng Nghaerdydd, 14 Chwefror 1961.

Awdur

Dr Brynley Francis Roberts

Ffynonellau

Who was who?

The Times, 20 Chwefror 1961

Nature, 1961

Dolenni Ychwanegol

Wikidata: [Q20732630](https://www.wikidata.org/wiki/Q20732630)

Dyddiad cyhoeddi: 1997

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

